

**INFORMACIJA O AKTIVNOSTIMA NA IZRADI KOREKCIJE  
PRIJEDLOGA REGULACIONOG PLANA „KVADRANT C - MARIJIN DVOR“  
- PRIMJEDBE UNIVERZITETA U SARAJEVU -**

Dana 28.04.2026. godine, na osnovu Molbe Univerziteta u Sarajevu za organizaciju sastanka, akt broj: 0101-4401/26 od 24.04.2026. godine, u čijem prilogu je dostavljen Zaključak Senata UNSA, broj 01-10-2/26 od 22.04.2026. godine, gradonačelnik Grada Sarajeva organizirao je sastanak u prostorijama Zavoda za planiranje razvoja Kantona Sarajevo sa predstavnicima Univerziteta u Sarajevu.

Tom prilikom, izrazio je podršku rješavanju svih nejasnoća sa namjerom da se putem konstruktivnog i otvorenog dijaloga definiraju aktivnosti koje je potrebno provesti u cilju dobivanja kompromisnog i odgovarajućeg rješenja.

S obzirom na iskazano nezadovoljstvo Univerziteta u Sarajevu i traženje preispitivanja predloženog urbanističkog rješenja i njegovog usklađivanja sa potrebama i vizijom Univerziteta u Sarajevu, zaključeno je da će Univerzitet u roku od 21 dan dostaviti prijedlog optimalnog saobraćajnog rješenja, kako bi Nosilac pripreme i Nosilac izrade zauzeli konačan stav.

Uvažavajući navedeni zaključak sastanka, gradonačelnik je povukao Prijedlog planskog akta sa dnevnog reda aprilske sjednice Gradskog vijeća Grada Sarajeva.

Dana 21.05.2026. godine, na poziv Zavoda za planiranje razvoja KS, a na osnovu zahtjeva Univerziteta u Sarajevu, održan je sastanak predstavnika Grada, UNSA i Zavoda, na kom je izneseno da je Univerzitet formirao Komisiju za dodatnu stručnu analizu Prijedloga RP „Kvadrant C – Marijin Dvor“.

Nakon diskusije, zaključeno je da će Univerzitet u roku od 15 dana dostaviti svoj zvaničan prijedlog optimalnog saobraćajnog rješenja.

Dana 04.06.2026. godine održan je novi sastanak predstavnika Grada, UNSA i Zavoda, na kojem je razmatrana dostavljena Stručna analiza Komisije UNSA.

Nakon diskusije, zaključeno je da će Univerzitet do 11.06.2026. godine dostaviti svoj zvaničan prijedlog za izmještanje saobraćajnice Nosiocu pripreme, koji će na osnovu istog odlučiti o daljoj proceduri.

U skladu sa zaključkom sastanka od 04.06.2026. godine u Zavodu za planiranje razvoja KS, Univerzitet u Sarajevu je svojim aktom, broj: 0101-6063/26 od 11.06.2026. godine, dostavio dopunu smjernica za izmjenu Prijedloga Regulacionog plana „Kvadrant C – Marijin Dvor“, kako slijedi:

*„1. Izmještanje planiranog saobraćajnog priključka objektima u obuhvatu Regulacionog plana Kvadrant „C“ sa ulice Zmaja od Bosne prema istoku i izvan obuhvata vlasničke parcele Univerziteta na potezu pravac „sjever-jug“.*

*2. Saobraćajni pristup specijaliziranom centru osigurati priključkom na saobraćajnicu iz tačke 1. putem uspostavljanja kontroliranog ulaza u obuhvat Univerziteta na potezu između objekata Mašinskog fakulteta i visokog objekta Prirodno-matematičkog fakulteta (PMF) — pravac „istok-zapad“. Ovim urbanističko-tehničkim rješenjem osigurava se da sve unutrašnje saobraćajnice zadrže isključivo interni karakter u funkciji objekata obrazovanja i naučno-*

istraživačkog rada, što je u potpunosti usklađeno sa principima i postavkama važećeg Urbanističkog plana vezano za specijalizirani centar, te podiže nivo bezbjednosti studenata i zaposlenika. S obzirom na zatečene prostorne uslove i distance između građevinskih linija postojećih objekata, unutar ovog koridora (pravac „istok-zapad“) planirati minimalni tehničko-eksploatacioni profil, odnosno užu saobraćajnicu restriktivnih gabarita, prilagođenu isključivo režimu kontroliranog, dvosmjernog internog saobraćaja, čime se maksimalno rasterećuje i štiti okolna pješačka površina.

3. Zadržavanje planiranog pristupa Mašinskom fakultetu sa novoplaniranom saobraćajnicom iz tačke 1. i koja je u Prijedlogu Regulacionog plana pozicionirana sa istočne strane objekta ovog fakulteta. Na ovaj način se osigurava kolski pristup, dostava i logistika Mašinskog fakulteta putem istočnog koridora i južne strane Mašinskog fakulteta, te dodatno rasterećuje unutrašnje dvorište i prostor između dva fakulteta.

4. U potpunosti brisati novoplanirana parking mjesta u blizini niskog objekta Prirodno-matematičkog fakulteta kako bi se izbjegla neposredna blizina motornog saobraćaja/vozila i naučno-istraživačkih laboratorija i prostora Prirodno-matematičkog fakulteta (parking pozicije sa brojem parking mjesta PM13, PM15 i PM5).

U ovom obuhvatu posebno voditi računa o funkciji tehnološkog dvorišta sa postojećim podzemnim spremnicima i infrastrukturu, te potencijalnim razvojnim kapacitetima u kontekstu potreba budućih istraživačkih prostora. Kod planiranja ostatka obuhvata univerzitetskog prostora prioritet dati formiranju botaničke bašte, pješačkih zona i otvorenog Edukacijskog prostora.

#### Specifična pitanja vezana za objekt na parceli br. 6

Sa stajališta metodologije prostornog planiranja i urbanističke prakse, izuzetno je neuobičajeno da se u neposrednoj blizini ili unutar funkcionalno definiranih specijalizovanih centara (u ovom slučaju kompleksa namijenjenog obrazovanju i naučno-istraživačkom radu) pozicioniraju komercijalno-poslovni objekti, a pogotovo da se u njima planiraju stambene jedinice. Ovakve strukture po pravilu narušavaju funkcionalnu homogenost i autonomiju prostora namijenjenog obrazovanju i naučno-istraživačkom radu i ne smatraju se komplementarnim. Ipak, Univerzitet u Sarajevu u potpunosti razumije da je trenutni status ove parcele posljedica kompleksnih postratnih tranzicijskih procesa i zatečenog stanja na terenu. Želeći se jasno ograditi od praksi narušavanja cjelovitosti akademskog prostora, ali istovremeno uvažavajući realnost prostornog konteksta i potrebu za konstruktivnim rješenjima, cijenimo da se u cilju ublažavanja negativnih efekata mogu razmotriti dvije alternative:

1. Da se na građevinskoj parceli br. 6 planiraju objekti sa primarnom namjenom društvene djelatnosti — strogo poslovne, te za potrebe naučno-istraživačkog rada, obrazovanja i kulture, a kojima se pristupa direktno iz obuhvata specijaliziranog centra. Izmjenom namjene ove parcele i eliminiranjem stambene funkcije postiže se potpuna funkcionalna komplementarnost sa okolnim objektima, te stvara pretpostavke da se i saobraćajni pristup ovoj parceli trajno integrira unutar internog, kontroliranog saobraćajnog režima samog Univerziteta, bez rizika od uvođenja klasičnog javnog saobraćaja.

2. Ukoliko se analizom utvrdi da promjena namjene objekta na parceli br. 6 u pravcu društvenih djelatnosti pravno-formalno nije moguća, zahtijeva se zamjensko saobraćajno rješenje. U tom slučaju, saobraćajni pristup objektu potrebno je planirati pozicioniranjem namjenske pristupne saobraćajnice zatvorenog karaktera (interne saobraćajnice pod posebnim režimom) uz postojeći požarni put sa zapadne strane niskog objekta PMF-a, a koja bi vodila isključivo do objekata Srednje škole za okoliš i drveni dizajn i predmetne parcele br.

6. Ovim rješenjem se javni i komercijalni saobraćaj u potpunosti izoluje i izmješta na krajnju zapadnu marginu obuhvata Univerziteta. Time se dragocjeni središnji prostor između visokog

*objekta Prirodno-matematičkog fakulteta i Mašinskog fakulteta u potpunosti štiti od motornih vozila, te ostavlja slobodnim za pješačku zonu, otvoreni edukacijski prostor i realizaciju planirane botaničke bašte.“*

Dana 16.06.2026. godine, održan je sastanak predstavnika Grada Sarajeva i Zavoda za planiranje razvoja KS, na kojem su razmotrene i prihvaćene dostavljene smjernice Univerziteta u Sarajevu, te je zaključeno da Zavod pristupi korekciji Prijedloga planskog dokumenta, u skladu sa istim.